

आकाशवाणी जयपुर-अजमेर

प्रादेशिक समाचार

दिनांक 08.08.2025

समय: 18.45 बजे

- केन्द्रीय कैबिनेट 12 हजार करोड़ रिप्यां सूं बत्ती री लागत सूं पी.एम. उज्ज्वला योजना रा उपभोक्तावां खातर सब्सिडी जारी राखबा ने मंजूरी दी।
- मुख्यमंत्री भजनलाल शर्मा दिव्यांगां ने मजबूत बणावा खातर प्रदेशवासियां सूं संवेदनशीलता रे सागे कोशिश करबा ने कहा।
- केन्द्रीय कृषि मंत्री शिवराज सिंह चौहान 11 अगस्त ने झुंझुनूं मांय काश्तकारां ने प्रधानमंत्री फसल बीमा क्लेम री राशि देवेला।
- चुनाव आयोग आप री वेबसाइट सूं राज्यां री ई मतदाता सूची हटाबा री खबरां रो खण्डन कर्यो है।

000

केन्द्रीय कैबिनेट प्रधानमंत्री उज्ज्वला योजना री सब्सिडी जारी राखबा ने मंजूरी दे दी है। सरकार 12 हजार करोड़ रिप्यां सूं बत्ती री अनुमानित लागत सूं बरस 2025-26 खातर इण ने बढ़ावा री मंजूरी दी है। प्रधानमंत्री नरेन्द्र मोदी री अगुवाई मांय आज व्ही कैबिनेट री बैठक मांय केई अहम फैसले लिया गया। केन्द्रीय मंत्री अश्विनी वैष्णव नई दिल्ली मांय प्रेस वार्ता मांय इण री जाणकारी देता थकां बताया के इण योजनां ऊं दस करोड़ तैतिस लाख सूं बत्ता परिवारां ने फायदो पूग्यो है। श्री वैष्णव कहा के सरकार घरेलु गैस सिलेण्डरां माथे 300 रिप्यां ताई री सब्सिडी देवेला। या सब्सिडी बरस मांय 9 बगत मिलेला। सरकार सार्वजनिक हलका री तेज विपणन कंपनियां खातर तीस हजार करोड़ रिप्यां री क्षतिपूर्ति राशि भी मंजूर करी है।

केन्द्र सरकार चार हजार 250 करोड़ रिप्यां रा बजट रे सागे तकनीकी शिक्षा योजना अर अनुसंधान खातर सहायता राशि मंजूर करी है। इण सूं इंजीनियरिंग अर पॉलिटेक्निक कॉलेजां मांय गुणवत्ता सुधार कर्यो जावेला।

बैठक मांय असम अर त्रिपुरा खातर खास पैकेज भी मंजूर कर्यो गयो है।

000

मुख्यमंत्री भजनलाल शर्मा कहा के मानव जीवन रो लक्ष्य सेवा व्हेणो चाहिजे। सगळा लोगां ने संवेदनशीलता रे सागे दिव्यांगां ने मजबूत बणावा री कोशिश करणी चाहिजे। श्री शर्मा आज जामडोली मांय विशेष योग्यजन सम्मान समारोह मांय बोल रह्या हा। सामाजिक न्याय संकुल परिसर मांय राख्या इण जळसा मांय विशेष योग्यजन बहनां मुख्यमंत्री रे राखी बाधी। इण दौरान मुख्यमंत्री वां सूं बातचीत भी करी। वणा दिव्यांगां ने डिजिटल हियरिंग, ऐड, लर्निंग किट अर ट्राइसाइकिल भेंट करी। इण सूं पैली मुख्यमंत्री संकुल परिसर मांय सिंदुर रो पौधो भी लगायो। मुख्यमंत्री कहा के सरकार री योजनावां रो फायदो हर व्यक्ति ताई पूगणो चाहिजे।

000

रक्षाबंधन रो तिवार काल मनायो जावेला, ओ दिन भाई-बहनां रा प्रेम रो प्रतीक है। इण दिन बहन-भाई री कलाई माथे राखी यानी रक्षा सूत्र बांधे है अर भाई उण री रक्षा रो बचन देवे है। एक रपट।

000

राष्ट्रपति द्रोपदी मुर्मू रक्षा बंधन रा तिवार री बधाई अर शुभकामनावां दी है। आप रा संदेश मांय वणा कह्या के भाई-बहन रा अटूट बंधन रो यो तिवार समाज मांय समरसता अर एकता री भावना ने बढ़ावे है। वे कह्या के ओ तिवार भारत री समृद्ध सांस्कृतिक विरासत अर नैतिक मूल्यां ने संजोबा रो एक मौको भी है।

000

राज्यपाल हरिभाऊ बागडे संस्कृत दिवस ऊं पैली री सिंज्यां माथे आज प्रदेश वासियां रे नाम शुभकामना संदेश देवेला। ओ संदेश आकाशवाणी रा सगळा केन्द्रा ऊं अब सूं थोडी देर मांय सिंज्यां रे 7 बजे प्रसारित कर्यो जावेला। विधानसभा अध्यक्ष वासुदेव देवनानी संस्कृत दिवस माथे प्रदेशवासियां ने शुभकामनावां दी है। आप रा संदेश मांय श्री देवनानी कह्या के संस्कृत भारतीय ज्ञान परम्परा दर्शन अर विज्ञान री मूल आत्मा है। इण ने बचार राखणो आप री जिम्मेदारी है। वणा कह्या के संस्कृत दिवस आप री जड़ा सूं जुड्या रहबा अर विरासत ने आगली पीढी ताई पूगाबा ने प्रेरित करे है।

000

प्रधानमंत्री फसल बीमा योजना रे तैत 11 अगस्त ने काश्तकारां ने फसल बीमा क्लेम री राशि दी जावेला। केन्द्रीय कृषि मंत्री शिवराज सिंह चौहान झुंझुनूं मांय होबा वाळा इण कार्यक्रम मांय सिरकत करेला। इण मौके मुख्यमंत्री भजनलाल शर्मा भी मौजूद रहवेला। कृषि अर उद्यानीकी प्रमुख शासन सचिव राजन विशाल आज इण समारोह री तैयारियां बाबत् बैठक ली। वणा जयपुर ऊं वीडियो कॉन्फ्रेंसिंग रे जरिये झुंझुनूं, कोटपूतली अर सीकर जिला कलेक्टरां रे सागे इण बारा मांय चर्चा करी। श्री विशाल नोडल अहलकारां सूं आपसी मेल-मिलाप सूं काम करता थकां जळसा री सगळी तियारियां पूरी करबा रा निर्देश दिया।

000

मुख्यमंत्री भजन लाल शर्मा जयपुर री मुहाना फल सब्जी मंडी मांय बायो सीएनजी प्लांट लगाबा री परियोजना ने मंजूरी दी है। इण सूं सब्जी मंडी मांय जैविक कचरा रो सही तरीका ऊं प्रबंधन व्हे सकेला अर उण ने कम्पोस्ट अर बायो- सीएनजी मांय बदल्यो जा सकेला इण संयत्र री थापना पीपीपी मॉडल माथे करी जावेला। इण सूं रोजाना सौ टन जैविक कचरो प्रोसेस कर्यो जा सकेला, जिण सूं पांच टन कम्पोस्ट अर बायो सीएनजी बणेला।

000

प्रदेश मांय दस मजूरां रा नियोजन माथे संस्थानां ने पंजीयन सूं छूट मिलेला। मुख्यमंत्री भजनलाल शर्मा राजस्थान दुकान एवं वाणिज्यिक संस्थान अधिनियम 1958 मांय फेर बदल कर या रियायत दी है। इण सूं छोटी दुकानां अर वाणिज्यिक संस्थानां ने व्यापार करबा मांय सहूलियत मिल सकेला।

000

निर्वाचन आयोग आज न्यारा-न्यारा सोशल मीडिया प्लेटफॉर्म माथे चाल री उण खबरां ने नकार दियो जिण मांय चुनाव आयोग री कानी ऊं रातोंरात आप री वेबसाइट सूं केई राज्यां री ई-मतदाता सूची हटाबा री बात करी गयी है। आयोग इण खबरां ने गलत बताता थकां कह्यो के कोई भी व्यक्ति आयोग वेबसाइट माथे 36 राज्यां अर केंद्र शासित प्रदेशां मांय सूं किणी भी मतदाता सूची ने डाउनलोड कर सके है।

000

विश्व आदिवासी दिवस काल है। दुनियाभर मांय यो दिन आदिवासी समूदायां रा अधिकारां री रक्षा अर वां री संस्कृति री पिछाणा रो सम्मान करबा खातर मनायो जावे है। इण बरस री थीम **आदिवासी लोग और ए आई—अधिकारों की रक्षा, भविष्य को आकार देना** राखी गयी है। इण दिन न्यारा—न्यारा कार्यक्रमों रे जरिये आदिवासियां री सामाजिक अर आर्थिक चुनोतियां रा बारा मांय लोगां ने जाणकारी दी जावे है। इण कड़ी मांय केन्द्रीय संचार ब्यूरो री कानी ऊं सवाईमाधोपुर मांय विश्व आदिवासी दिवस ऊं पैली री सिंज्यां माथे एक खास कार्यक्रम राख्यो ग्यो। प्रभारी अधिकारी नेमीचंद मीना बताया के इण दौरान केई भात री होड़ा व्ही इण रे सागे ही आदिवासियां रा अधिकारां अर वां री समस्या माथे चर्चा करी गयी। राज्यपाल हरिभाऊ बागडे विश्व आदिवासी दिवस री शुभकामनाएं दी है। श्री बागडे आदिवासियां ने मुख्य धारा मांय ल्याबा अर वां री प्रकृति संरक्षण परम्परावां खातर मिल र काम करबा ने कहा।

000

बांसवाड़ा मांय आज एक सड़क हादसा मांय तीन मजूरों री मौत व्हे गयी अर पांच दूजा घायल व्हे ग्या। पुलिस रे मुजब दुर्घटना सदर थाना हलका रा कुपड़ा मारग माथे ट्रक पलटबा सूं व्ही। घायलां ने जिला सफाखाना मांय भर्ती करायो गयो है। वठिने गम्भीर रूप ऊं घायल एक मजूर ने उदयपुर रैफर कर्यो गयो है।

000

सेना रा दक्षिण पश्चिम कमान रा जनरल ऑफिसर कमांडिंग इन चीफ लेफ्टिनेंट जनरल मनजिन्दर सिंह आज श्रीगंगानगर मांय लालगढ जाटान सैन्य स्टेशन रो दौरा कर्या। वणा प्रशिक्षण गतिविधियां अर लॉजिस्टिक माथे चर्चा करी। वणा ड्रॉन अर काउन्टर ड्रॉन प्रयोगशालावां रो भी जायजो कर्यो।

000

रामदेवरा मेळा मांय सिरधालूआं री सुविधा खातर रेल्वे दस अगस्त सूं एक और मेळा स्पेशल ट्रेन चलावेला। या रेल 31 अगस्त ताई चालेला। इण दौरान आ रेलगाड़ी 22 फेरा लेवेला। आ रेलगाड़ी राई का बाग, मंडोर, लोहावट अर फलौदी समेत केई टेशनां माथे ठहरेला।

000